

2. As correspondentes actividades definidas no artigo 4 inscribíranse de forma paulatina nos diferentes rexistros oficiais de establecementos e servizos biocidas autonómicos a medida que se actualice o anexo.

Disposición adicional segunda. *Remisión dos expedientes dos establecementos e servizos biocidas actualmente inscritos nos diferentes rexistros oficiais dos establecementos e servizos praguicidas.*

Os expedientes dos establecementos e servizos praguicidas incluídos no ámbito de aplicación do Real decreto 1054/2002, do 11 de outubro, inscritos no Rexistro Oficial de Establecementos e Servizos Praguicidas en virtude da Orde do 24 de febreiro de 1993, pola que se normaliza a inscrición e o funcionamento do Rexistro de Establecementos e Servizos Praguicidas, serán transferidos ao novo Rexistro Oficial de Establecementos e Servizos Biocidas no prazo que determine a autoridade sanitaria competente en cada comunidade autónoma.

Disposición adicional terceira. *Empresas de servizos biocidas con sede social fóra do territorio nacional e dentro do territorio da Unión Europea.*

Aquelas empresas de servizos biocidas a terceiros cuxa sede social estea fóra do territorio nacional e dentro do territorio da Unión Europea, deberánse ater ao procedemento descrito no artigo 10 e seralles de aplicación o resto das disposicións normativas relativas a empresas de servizos biocidas cando presten no noso país servizos de aplicación de biocidas.

Disposición derogatoria única. *Derrogación normativa.*

1. Quedan derogados os artigos 1.º, 2.º e 3.º da Orde do 24 de febreiro de 1993, pola que se normalizan a inscrición e o funcionamento do Rexistro de Establecementos e Servizos Praguicidas, en todo o que se opoña ao establecido nesta orde para os establecementos e servizos praguicidas non agrícolas (biocidas).

2. Quedan derogadas cantas disposicións de igual ou inferior rango se opoñan ao establecido nesta orde.

Disposición derradeira única. *Entrada en vigor.*

Esta orde entrará en vigor o día seguinte ao da súa publicación no «Boletín Oficial del Estado».

Madrid, 13 de outubro de 2006.–A ministra de Sanidade e Consumo, Elena Salgado Méndez.

## ANEXO

Grupos e tipos de biocidas que obrigan á inscrición dos establecementos e servizos biocidas no Rexistro Oficial de Establecementos e Servizos Biocidas (ROESB).

Grupos e tipos de biocidas:

Grupo principal 1:

a) Tipo de produto 2. Desinfectantes: produtos empregados para a desinfección do aire, superficies, materiais, equipamentos e mobles que non se utilicen en contacto directo con alimentos ou pensos, en zonas da esfera privada, pública ou industrial.

Estes produtos correspóndense cos actualmente inscritos no Rexistro Oficial de Praguicidas da Dirección Xeral de Saúde Pública coas claves 00, 20, 40 e 100.

b) Tipo de produto 4. Desinfectantes para as superficies que están en contacto con alimentos: equipamentos, recipientes, utensilios para consumo, superficies ou tubaxes relacionadas coa produción, transporte, almace-

namento ou consumo de alimentos e bebidas, excluída a auga para o consumo humano.

Estes produtos correspóndense cos actualmente inscritos no Rexistro Oficial de Praguicidas da Dirección Xeral de Saúde Pública coas claves 00, 20 ou 40 e as siglas HA.

Grupo principal 2:

a) Tipo de produto 8. Protectores da madeira: produtos empregados para a protección da madeira ou derivados da madeira, desde a fase do serradoiro.

Estes produtos correspóndense cos actualmente inscritos no Rexistro Oficial de Praguicidas da Dirección Xeral de Saúde Pública coas claves 00 e 80.

b) Tipo de produto 11. Produtos empregados para a conservación da auga en sistemas de refrixeración mediante o control de organismos nocivos.

Estes produtos correspóndense cos actualmente inscritos no Rexistro Oficial de Praguicidas da Dirección Xeral de Saúde Pública coas claves 00 e 100, exclusivamente para uso en torres de refrixeración, condensadores evaporativos e arrefriadores adiabáticos que pulvericen auga.

Grupo principal 3:

a) Tipo de produto 14. Rodenticidas: estes produtos correspóndense cos actualmente inscritos no Rexistro Oficial de Praguicidas da Dirección Xeral de Saúde Pública coas claves 00 e 10.

b) Tipo de produto 18. Insecticidas: produtos empregados para o control dos artrópodos (insectos, arácnidos e outros).–Estes produtos correspóndense cos actualmente inscritos no Rexistro Oficial de Praguicidas da Dirección Xeral de Saúde Pública coas claves 00 e 30.

c) Tipo de produto 19. Repelente/atraente: produtos empregados para o control dos organismos nocivos mediante repulsión ou atracción, excluídos os empregados en hixiene veterinaria ou humana.–Estes produtos correspóndense cos actualmente inscritos no Rexistro Oficial de Praguicidas da Dirección Xeral de Saúde Pública coas claves 00 e 50.

**18559** *ORDE SCO/3270/2006, do 13 de outubro, pola que se desenvolve o Real decreto 2210/1995, do 28 de decembro, polo que se crea a Rede Nacional de Vixilancia Epidemiolóxica, en relación coas salmoneloses de transmisión alimentaria.* («BOE» 255, do 25-10-2006.)

O desenvolvemento social e económico do noso país fai que a produción industrial dos produtos alimenticios, a súa extensa comercialización e o seu elevado consumo sexan elementos cada vez máis presentes e xeneralizados na nosa sociedade.

Este fenómeno está a provocar cambios no patrón epidemiolóxico coa aparición de focos de ámbito supracomunitario, de gravidade variable, magnitudes significativas e ampla transcendencia social, que están provocando situacións de alarma entre a poboación. Como consecuencia disto, resulta necesario introducir elementos que melloren a capacidade de detección e resposta da rede nacional de vixilancia epidemiolóxica, en particular respecto dos abrochos de gastroenterite producidos por enfermidades relacionadas coa produción e consumo de alimentos.

Débase destacar, neste sentido, que a salmonelose é unha das causas principais de gastroenterite bacteriana en España. De todas as notificacións realizadas ao sistema de abrochos da Rede Nacional de Vixilancia Epidemiolóxica nos últimos anos, as debidas á salmonela

supuxeron o 80 por cento dos abrochos con axente causal coñecido.

A experiencia acumulada demostra que a urxencia na declaración destes abrochos permite un rápido e mellor posicionamento para a súa abordaxe. No nivel internacional, e especialmente no europeo, as redes de vixilancia epidemiolóxica recollen procedementos operativos que permiten mellorar a detección e resposta rápida ante os riscos da saúde e a comparabilidade e intercambio dos datos, por iso a nosa rede de vixilancia debe adaptarse ao disposto neste contexto.

Os dez anos de vixencia do Real decreto 2210/1995, do 28 de decembro, polo que se crea a Rede Nacional de Vixilancia Epidemiolóxica, e os cambios lexislativos producidos pola Unión Europea apoian esta consideración. De entre estes cambios lexislativos cabe destacar a Decisión n.º 2119/98/CE, do Parlamento Europeo e do Consello, do 24 de setembro de 1998, pola que se crea unha rede de vixilancia epidemiolóxica e de control das enfermidades transmisibles na comunidade, a Decisión n.º 2000/57/CE, da Comisión, do 22 de decembro de 1999, relativa ao sistema de alerta precoz e resposta para a vixilancia e control das enfermidades transmisibles, e a Decisión n.º 2003/542/CE, da Comisión, do 17 de xullo de 2003, pola que se modifica a Decisión n.º 2000/96/CE relativa á operativa das redes de vixilancia específicas, na cal se enumeran as enfermidades transmisibles que deben quedar progresivamente comprendidas na rede comunitaria.

Esta disposición foi sometida, na súa tramitación, ao Pleno do Consello Interterritorial do Sistema Nacional de Saúde.

Esta orde dítase de conformidade co establecido na disposición derradeira primeira do Real decreto 2210/1995, do 28 de decembro.

Na súa virtude, dispoño:

#### Artigo 1. *Obxecto.*

Esta orde ten por obxecto desenvolver o Real decreto 2210/1995, do 28 de decembro, polo que se crea a Rede Nacional de Vixilancia Epidemiolóxica, en relación coas salmoneloses de transmisión alimentaria, e establecer a notificación obrigatoria e urxente ao Ministerio de Sanidade e Consumo, a través do Centro Nacional de Epidemioloxía, de todos os abrochos de salmonelose debidos á transmisión alimentaria establecidos no artigo 2.

#### Artigo 2. *Notificación.*

Notificaranse os abrochos que cumbran algún dos seguintes criterios:

a) Abrochos en que existan, ou polas características do abrocho se considere que poidan existir, afectados doutras comunidades autónomas e cidades con Estatuto de autonomía.

b) Abrochos en que exista ou se sospeite que poida existir relación cun produto comercializado no ámbito da Unión Europea.

#### Artigo 3. *Obrigatoriedade da notificación.*

Esta obrigatoriedade afecta a todos os médicos en exercicio e os centros sanitarios públicos e privados que sospeiten casos coas características citadas.

As autoridades competentes das comunidades autónomas e cidades con Estatuto de autonomía regularán o circuíto de información apropiado e incluírán o seguimento destes abrochos, de acordo coas súas competencias e dentro do seu territorio.

#### Artigo 4. *Elaboración de protocolos.*

A Comisión de Saúde Pública do Consello Interterritorial do Sistema Nacional de Saúde establecerá os protocolos pertinentes de notificación, vixilancia e control dos abrochos de salmonelose de transmisión alimentaria, así como as necesarias revisións e actualizacións dos ditos protocolos.

#### Artigo 5. *Adopción de medidas de actuación complementarias.*

O Ministerio de Sanidade e Consumo, a través das súas unidades competentes na materia (Dirección Xeral de Saúde Pública, Axencia Española de Seguraza Alimentaria e Instituto de Saúde «Carlos III»), acordará coas comunidades autónomas e cidades con Estatuto de autonomía, no seo do Consello Interterritorial do Sistema Nacional de Saúde, as medidas de coordinación, as decisións e as recomendacións que se requiran para o control destes abrochos así como as accións que se consideren precisas para a correcta e eficaz aplicación desta orde.

#### Disposición derradeira única. *Entrada en vigor.*

Esta orde entrará en vigor o mesmo día da súa publicación no «Boletín Oficial del Estado».

Madrid, 13 de outubro de 2006.—A ministra de Sanidade e Consumo, Elena Salgado Méndez.

**18636** *ORDE SCO/3283/2006, do 19 de outubro, pola que se modifican os anexos II e III do Real decreto 1599/1997, do 17 de outubro, sobre produtos cosméticos.* («BOE» 256, do 26-10-2006.)

O Real decreto 1599/1997, do 17 de outubro, sobre produtos cosméticos, recompilou nun só texto toda a normativa existente sobre esta materia, adaptándoa á lexislación comunitaria. As ordes do 4 de xuño de 1998, do 26 de abril de 1999, do 3 de agosto de 2000, e as ordes SCO/249/2003, SCO/1448/2003, SCO/2592/2004, SCO/3664/2004, SCO/544/2005, SCO/3691/2005, SCO/747/2006 e SCO/1730/2006 modificaron os anexos deste real decreto.

Este real decreto foi modificado polo Real decreto 2131/2004, do 29 de outubro, e o Real decreto 209/2005, do 25 de febreiro.

A Directiva 76/768/CEE do Consello, do 27 de xullo de 1976, relativa á aproximación das lexislacións dos Estados membros en materia de produtos cosméticos, foi obxecto de sucesivas modificacións, a última delas mediante a Directiva 2006/65/CE, da Comisión, do 19 de xullo de 2006.

Mediante esta disposición trasponse esta directiva ao ordenamento xurídico interno, de acordo co establecido na disposición derradeira primeira do Real decreto 1599/1997, do 17 de outubro.

Na súa virtude, dispoño:

#### Artigo primeiro. *Modificación dos anexos II e III do Real decreto 1599/1997, do 17 de outubro, sobre produtos cosméticos.*

O Real decreto 1599/1997, do 17 de outubro, sobre produtos cosméticos, queda modificado como segue:

Un. No anexo II engádense os números de referencia 1212 a 1233 seguintes: